

Adamuridagunt to Tagumairagüdaru Garada to Ayanuhabaun luagu le yubat haun gürigia ubauwagu

Tagúmeseha

Subúsewati ubauwagu, dan lan ligirún gürigia lun ladúgüni le ligundan, ibihalai le yubai lun lidan deregüdaguau, ligia lan lagüchabai gudúmei hadan sun idúheñu.

Subúsewatiluagu, dan lan meferen lan luma mabahüdüniwa lan le yubai lun gürigia, ru lan ubafu lun afósihani, mañuragunti giñe saminaü ubauwagu. Ligia lichigunbai subudi lun giarabailan linúragun gürigia lidangien anáfudei labu yumúraü le gadanbalin, lun lubá gia lówagachun lau le aubai magundan lan, ariñegalai me le uáguti lafiñera;

Subúsewatiluagu megeiwa tan aban lúrudu lun taunigiruni sun le yubai haun gürigia, lun lubá gia úalá afosuruti lun ladúgüni le mabusienru lubai tanógangien lúrudu;

Subúsewati giñe luagu megeiwa lan lahimeidun umódaguau lidan sun ubau;

Subúsewati luagu, sun lan fulasu le áundarubai tidaun Ubau Uarati rúhamali hafiñe tuagu Garada to, mamai tichiga inébehabu hawagu idúheñu fulásurugu, ayónuha luagu le yubai lun gürigia, ru tugia me úarani lun wügüritabu würi ubauwagu; afiñewati luagu lawónsera lan me sun ubau lugundu hawiwanda me gürigia lidan ibógari richati;

Subúsewati luagu, sun lan ubau le áundarubai tidaun Adámuri Lani Ubau Uarati ariñegaña luagu ñeibai lan inébehabu luagu le yubai lun gürigia adügalai me ligúndan:

Subúsewati luagu, dan úara lan saminaü sigénewali, lagúnfuliruba daradu:

adamuridagunt to

Tagumairagüdaru

garada to ayanuhabaun luagu le

yubathaun gürigia ubauwagu

Lun lubá gia hasubudiragüdüni tila lun sun ubau, haun sun gürigia. Aban górada íchigutu adundehaní haun sun mutu lun lubá gia inebe lan sun saminaü le títanbai, haucha wagia me lun tarausún tidan luban furendei, haun furumieguarügü dandu lidan hagaira ha asibihabalún kaisi lidan sun fulasu le aubai teréreha.

Saminaü 1

Sun gürigia nasíruati yuti lun, lidan úarani, lawiwanduní libógari kai le aubai labúsienra, gatu giñe lanagun lingua buidu hadan líbegu.

Saminaü 2

Ka gürigia, würi, wügüri, yuti lun libíhini sun buidu le títanbai Górada to, katai yebe, linósinñu, lewegerún, lagücha, lafiñe, liñeñe, lisóminan luagu gumadi, lúyeri libógari, lagüriahaun odi le auti lanagua lingua.

Siñabai giñe, ñei lan díseguau luagu ligóburi saminaü anügüti ubafu bagaira ni luagu tigóburi lúrudu to agumairutu ñei, siñá memebai giñe ñei lan díseguau luagu lúyeri aruwaihaní arainiruti bagaira, dipeni yebe ligia luaigien amu.

Saminaü 3

Ka gürigia yuti lun labógaridun kai le aubai labúsienra, lun lasóriñahan, adügalai me le ligundan inébewa ligia me.

Saminaü 4

Uati lunti lamuridún ni lun lamúdihan, lubá amúdihani luma lalugurún gürigia kai idámuni, faini lumuti lúrudu.

Saminaü 5

Siñati basufuriragüdün gürigia, barügüda, busíganu, anóneiha lun ñeigien bachúraguai.

Saminaü 6

Ka gürigia yuti lun, le ñei lumuti, lun inébewa lan lau lumógagun, lugundgu ka mutu amu linóhuri luai amu.

Saminaü 7

Sun mutu aban habu tigíbugien lúrudu, ani yuti giñe tun lúrudu taríhin hau. Yuti giñe tun lúrudu, lidan úarani, tererehan hau gürigia ligíbugien furumieguarügü lúyeri nabahüdüni.

Saminaü 8

Yuti tun lúrudu taríhin lau gürigia dan lérereguní likésin, gounigitai me hawai láganigu.

Saminaü 9

Tanógangien lúrudu, siñati lasiadirún gürigia, siñati lebélurun furísun, siñá labugún lagairagien.

Saminaü 10

Ka gürigia yuti lun, lidan úarani, lagambúniwa ligíbugien gumadi lun lubó gia lasubudiragun lungua, kalan yubai lun, luma le lunbail ladúuguüni tagónagua lúrudu.

Saminaü 11

Yuti tun lúrudu tíchigun ubafu lun fulédeiwati lun layónuhan luaugua lidan agúseruni.

Siñabai ladaünragüdünibu gumadi anhain úa lubai bidúrun tidan lúrudu. Siñabai giñe badaürün luagu saragu dan luai le tidanbai lúrudu.

Saminaü 12

Uati lunti lóchachan liuma lidaun libógari amu ni lanóneiham haun lidúheñu, madóraham ligia me hagóradan amu, ua meúseraguti. Yuti giñe tun lúrudu terèérehan laugien furumieguarügü anhain asúsereda aban lídangien lamíselu le.

Saminaü 13

Ka gürigia yuti lun lasóriñahan le ñeihin lumuti labúsienra, wiwan ligia me lidan furumieguarügü fulasu le auti lagúndara.

Ka gürigia yuti lun láfuridun lidangien furumieguarügü fulasu, íbini lagairagien, giríbuya ligia me lagairaun.

Saminaü 14

Dan lasigirún odi lóibahaun furumieguarügü gürigia, yuti lun laríahan múñansu lidan furumieguarügü ubau ani gatu giñe lamuñadún.

Siñabai giñe ladaünrún amuñadahauti luagu furumieguarügü duru anhain úa lubai lúyeri duru ligia tidan górada to agumairubaun túmagien Ubau Uaratu.

Saminaü 15

Ka gürigia yuti lun gagaira lan.

Siñati beréderuni gürigia luai gagaria lan, siñá beréderuni anhain busien lubai lasansiruni lagaira.

Saminaü 16

Sun wügüriña hama würiña dan busienguaña lan haungua, yuti haun hadügüni habógari le auti helédaguai, katai yebe hanósiñun, hagaira labu hafiñe; wiwan hamaí mesun le líchigunbai sibili, lagónagua hamógualu hamón, labu larigien hígiragun.

Anhain hínsiñegua habai gadara-duntiñu haungua, gawarabai hasibilirún anhaña busien.

Umari habu isanigu hagia lagúchabaña ibógari lidan furumieguarügü adómuri, ani yuti giñe lun adómuri labu uruwai lóunigiruniña.

Saminaü 17

Yuti lun ka gürigia larihini lau le lónibai luma le hánibai sungua luagu.

Siñatiberéderuni gürigia luai le lónibai kaisi luai le yubai lun.

Saminaü 18

Sun gürigia yuti haun hasóminarun le auti habúsienra, lun hadügüni le líchigun haritagun haun, subudigüda hamaí me hafiñe lun ubau; gawarati giñe hasansiruni kaisi hagumairagüduni, ónhaña busien.

Saminaü 19

Yuti lun ka gürigia laríñeguni lubóliti lidan adamuridaguni bidaudu lamanichagüdúniwa, gawara ligia ladügün akútiñani, libihini, ariñahaní, subudigüdalai tidangien furumieguarügü gasibu, umólali tuma garüdia.

Saminaü 20

Sun gürigia yuti haun hadamuridagun hama ha úmati habúsienra kaisi haundaruh tidaun furumieguarügü adómuri súñeitu.

Siñati bafósurun gürigia lun lebélurun tidaun aban adómuri.

Saminaü 21

Yuti lun ka gürigia habúduhan lílana lagaira luagu haucha ligia me luaugua lun lebélurun lidaun gumadi.

Sun gürigia yuti haun, lidan úarani, habíhin wadógimanu luma le arruwaihabai hagaira.

Le ligundan ubau ligia lagúchabai ubafu lani gumadi; igundani le, arihúati dan ñei lan asuesihani le ligíaguti, kaisi dan ñei lan abúduhani lidan larúman.

Saminaü 22

Ka gürigia kai lílana fulasu, yuti lun libihin sun lúyeri idemuai-seinsu, ibógari, aníchigudandu hómagien lílana lagaira kaisi lasúrunigien, lun lubá gia lasandiragun lungua kai aban gürigia seríwiti.

Saminaü 23

Ka gürigia yuti lun lidan úarani, libihin aban wadógimanu, lun laríahan wadagimanu lehínsiñeti lun, kai gubairügü libihin idemuai dan mayábun lan.

Yuti lun ka gürigia, lidan úarani, libihin aban meme fayeri luagu aban meme lúyeri wadógimanu.

Yuti lun ka gürigia awadigimariduti, libihin fayeri lun gawarabai lan lawíwandun habu lónigu, ibiha ligia me, anhain emégeira, amu idemuai lumagien uruwai.

Yuti sun gürigia hadügün aban adómuri lenébase wadógimanu, belú hagia me tidaun, lun lubá gia haunigiruní le yubai haun.

Saminaü 24

Sun gürigia yuti haun, heméragun larigien somu dan wadógimanu, lun hasóriñahan dan mawadigimaridun hamón, kaisi tafayeriún hasóriñahan haun.

Saminaü 25

Ka gürigia yuti lun lamnügün aban lúyeri ibógari richati, lun lubá gia gawara lan ladairun atuadini, araini, aigini, daüguaü, muna, lafaóyeirun surúsia luma furumieguarügü megeiguaü haun lónigu. Yuti giñe lun, libihin idemuai dan mayábun lan, dan lasóndirun, dan lasiñaragún lungua, dan hilaru, lúmari, dan lawaiyadun, kai gubairügü furumieguarügü idemuai dan mama lan ligia íchiga üma lun leferidiruní lébuna libógari.

Yuti haun dagainatiñu habu iróhüñü lun letenirún haun, lau duóri. Sun iróhüñü ha nasíruatiñu lidan odi bárugudi luai sinbili, yuti haun hauniguirún lidan aban.

Saminaü 26

Sun gürigia yuti haun habihin furendei. Anhaña atúriaha tidan luban furumieti furendei, mafayeirúbaña ni aban gówanü. Yuti lun uruwai laturiagüdüniña gürigia tidabn luban furumieti furuendei. Aturiahani tidan luban segandi furendei aban memebai lila haun sun mutu. Liabin ti ebéluruni tidaun luban furundei iñuti, hafu lauchun gürigia luaagua.

Sun furendei mosu taríahan tahímeidun lusan gürigia, ru ligia inébehabu luagu sun le yubai haun lílana fulasu; luyéri furendei le lunbai libihini gürigia gatu giñe líchigun saminaü lun ñebai lan gufúrandau, awandahani labu umódaguaü hadan sun mutu, itararügübai gawara lan lawóndahani labu umódaguaü hadan sun mutu, itararügübai gawara lan lawónserun tuódigimari Ubau Uaratu, lun lubá gia ñei meme lan darangilaü ubauwagu.

Yuti haun agüburigu hasuesihani luyéri furendei le lunbai habihini hasanigu.

Saminaü 27

Yuti lun ka gürigia lóundarun lidaun lechun lagaira, le auti labúsienra, lun layúsurun lídangien hadíñeburi, ideha ligia me lun lawanserun lagaira.

Ka gürigia yuti lun taunigirún lidíñeburikai hamuga: garúdia, akútihani, féindiraeréreha tugia me lúrudu laugien.

Saminaü 28

Ka gürigia yuti lun lauchun, lun ñebai lan aban ürudüni lun giarabai lan lagúmairun sun saminaü le títanbai Górada to.

Saminaü 29

Sun gürigia anihain lunti ladügüni luagu lagaira, mamai ñei lagüriahauwa, ñei tahímeida lusan.

Sun gürigia mosu inébebaun tan lúrudu lun, ladüga tugiarügüñaun lan ariha lau le yubai haun amu, tugia aunigirubalin ibagari fulásrugu, ru tugia buídumei lun bawíwandun tidan aban adómuri úaratu.

Mauwebudunbai sun saminaü le títanbaun Górada to, anhawa magúnfulirun lau tubóliti Ubau Uaratu.

Saminaü 30

Uati ni aban saminaü tidan górada to lun hamuga líchigun ubafu lun furumieguarügü (kai hamúga gürigia, adómuri, uruwai) lun gawarabai lan ladügün somu katai barúnati luagun tubóliti góarada to.